



**Uunga siunnersuut: Ilinniartunut tapiisarneq pillugu Inatsisartut inatsisaat nr. xx, xx xxx 2017-imeersoq.**

(Inuusutissarsiornermut, Suliffeqarnermut, Niuernermut Nukissiuuteqarnermullu Naalackersuisoq)  
(Siullermeerneqarnera)

Matumani siunnersuummi ilinniartunut tapit pillugit malittarisassat inatsimmut ataatsimut eqiterneqarput, Demokraatillu isaanni tamanna pissusissamisuginnarpoq. Malittarisassat pisinnaatitaaffiillu takujuminarnerulissammata.

Demokraatini Naalackersuisutulli malugisimavarput nunatsinni inuusuttut akornanni suliffissaaleqisorpassuaqartoq. Pingaaruteqarpoq ataavartumik ilungersussagatta qularnaarumallugu inuusuttatta ilinniarfissarsinissaat suliffissarsinissaalluunniit. Demokraatit tungaanniit kissaatigaarput ullumimut naleqqiullugu meeqqat atuariata pitsaanerulernissaa, inuusuttut pitsaanerpaanik tunngavissaqaqqullugit ilinnialernissaminnut kingornalu suliffissarsinissaminnut.

Ajoraluartumik massakkorpiaq inuusuttorpassuit ilinniarnaq ajorput taamaasillutillu ilinniagaqarneq ajorput suliffissarsinissaasaratillu.

Tamatumunnga atatillugu isumaqarpugut inatsisissatut siunnersuut manna tunngavisseeqataasinnaasoq inuusuttut suliffissaqanngitsut suliffeqalersinnaanissaannut imaluunniit ilinniagaqalersinnaanissaannut. Taamaasilluni inuusuttut suliffittaarnissaat, ilitersorneqarnissat piginnaangorsarnissaallu pilersarusiorneqarsinnaalissaaq inuusuttut iluatsittumik ingerlaqqissinnaalersillugit siunissamilu qanittumi suliffittaarsinnaalersillugit imaluunniit suliffittaqqissinnaalersillugit aamma nunamiittunik suliffissanik nassaarniarneranni ikiorneqarsinnaangorlugit. Taamaattumik ilinniartunut tapiisarneq pillugu manna inatsisissatut siunnersuut taamaasilluni iluaqtaasinnaalissaaq.

Siunnersuut Inuusutissarsiornermut Aatsitassanullu Ataatsimiititaliamut innersuupparput.